



IZVJEŠTAJ 2010

Općinski načelnik

• 15 Januar 2011 •

Lokalna izvršna vlast

Tokom 2010. godine nastavili smo raditi dosljedno na strateškim opredjeljenjima i ciljevima, u različitim područja sa snažnim fokusom općinske uprave u pet područja kako bi se brže kretali ostvarenju vizije.

To su područja: reforma općinske administracije, ekonomija, ekologija, mladi i historijsko nasljeđe u funkciji razvoja turizma.

SERVIS OPĆINSKOM VIJEĆU

Međusobni odnosi Općinskog vijeća i Općinskog načelnika zasnivaju se na principima međusobnog uvažavanje i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje i razvoj općine. Iako je ovakav statutarno predviđen odnos često narušavan i javnosti predstavljena loša slika tih odnosa, osiguran je servis općinske administracije za rad Općinskog vijeća, prije svega prijedlozima materijala potrebnih za raspravu i odlučivanje kao i provođenje donesenih odluka. Općinska administracija je pripremila materijale za 129 tačaka dnevnog reda, i odgovorila na sva pitanja i inicijative osim u jednom slučaju. Ponekada su zaključci Općinskog vijeća bili zbnjujući za administraciju, jer nisu imali konzistentnost sa nadležnostima i ranijim odlukama što je otežavalo ne samo međusobni odnos Općinskog vijeća i Općinskog načelnika nego i otežavalo rad izvršne vlasti.

REFORMA OPĆINSKE ADMINISTRACIJA

a) edukacija

Tokom 2010. godine nastavili smo intenzivno raditi na putu ka novoj, modernoj lokalnoj administraciji na temelju novih tehnologija, znanja, vještina i procesnog pristupa. Naš cilj je elektronska uprava, ali ne samo uprava koja će biti moderna po alatima koje koristi, nego u isto vrijeme i uprava sa vrijednostima na koje ćemo biti ponosni. Temeljni posao na tom putu je završen, ostaju dogradnja, upotpunjavanje, otklanjanje slabosti i poboljšanja. Utvrdili smo početne performanse naše općinske administracije u različitim vrstama pružanja usluga, imamo neposredan uvid u trajanje svakog predmeta, kao i grupa predmeta po uposlenim, po odjelima i službama kao i administraciju u cjelini.

Tokom 2010. godine smo potpisali tri ugovora u različitim područjima za unapređenje administracije:

1. **IFC, međunarodna finansijska organizacija, članica Svjetske banke.** Ugovor potpisan 16. aprila 2010. godina a vrijednost projekta je **125.800,00 KM; IFC – 75.000,00 KM; Općina Tešanj – 50.800,00 KM (s tim da Općina Tešanj u novcu osigura 15.000,00 KM** a razliku u radu uposlenih općinske administracije na ovom projektu). Ovim projektom koji se završava u maju 2011. godine dobiva se efikasna organizacija i pojednostavljenje administrativnih postupaka koji se odnose na dozvole, licence, uvjerenja i saglasnosti na nivou Općine Tešanj; povećanje transparentnosti implementacije administrativnih postupaka na lokalnom nivou, te smanjenje troškova poslovanja u Općini Tešanj a u aprilu ćemo imati spremnu on-line bazu svih usluga koje pružamo sa obrascima, troškovima postupka i rokovima za direktan pristup građanima i poslovnom svijetu. Utvrđeni su novi rokovi trajanja postupaka koji uposlenim stavljaju ne krajnje zakonske rokove kao obavezne nego i mnogo kraće procesne rokove koji se moraju poštovati.
2. GTZ, upravljanje poslovnim zonama uz posredovanje REZ razvojne agencije iz Zenice. Projekat započet u Aprilu 2010. godine i okončan u decembru a tokom projekta su sudionici ispred Općine

Tešanj (Dr. Ismar Alagić, Muhamed Džihic i Selvedina Sejmenović) osposobljeni za izradu marketing plana poslovnih zona, te izrađen marketing plan poslovne zone Vila, Bukva.

3. SNV, holandska vladina organizacija za razvoj i Direkcija za evropske integracije BiH, ugovor potpisan 20. aprila 2010. godine a program traje 36 mjeseci. Planira se održavanje 18 teorijskih i 15 praktičnih radionice za tri godine na temu evropskih integracija i uticaja na lokalne zajednice – održano 7 (sedam).

Održano je 80 sati opće edukacije + 50 sati edukacije za rukovodni tim + 234 sata specijalne edukacije za pojedina specifična područja. Broj predavača: 51, broj tema: 60 a broj dana u kojima se održavala edukacija bio je: 80

Nove ideje kao jedan od alata Menadžment sistema općinske administracije je zaživio i imali smo 331 ideju za 21 mjesec, od čega je 159 prihvaćeno u realizaciju a ukupan iznos dodijeljenih stimulativnih sredstava po ovom osnovu bio je 6.930,00 KM.

Isto tako i novi alat „5S“ – čistoća i urednost radnog mjesta se redovno provodi i daje efekte poboljšanja u ovom području.

b) elektronska uprava

Nakon uvođenja nekoliko novih aplikacija u 2009. godini (DocuNova – upravni postupci, Kapija – registracija radnog vremena i obračun plaća, Projekti – baza podataka i praćenje kandidovanih kapitalnih projekata), ove godine smo implementirali prevođenje svih pisanih dokumenata koje zaprimamo u elektronsku formu skeniranjem, osigurali potrebnu opremu i prilagodili organizaciju tako da se sada stvarni proces potpuno odvija kroz softver i omogućuje puni nadzor. U ovom području smo odmakli najdalje u Bosni i Hercegovini prema informacijama kojima raspolažemo.

Uveli smo i novi alat: CALL CENTAR 72, prvi u BiH kao alat kojim povećavamo transparentnost i koji utiče pozitivno na smanjenje eventualne korupcije. Poziv prima neposredno sekretarica Općinskog načelnika, svaki poziv je snimljen na on-line bazi i dokumentovan, provjere se ažurno provode a identitet građana je zaštićen i ne koristi se bez odobrenja.

c) sistem kvaliteta

Urađena je revizija systemske dokumentacije, uvedena četiri ključna procesa i to: **OBRADA ZAHITJEVA, IZRADA I REALIZACIJA BUDŽETA, RAZVOJ ZAJEDNICE te IZRADA I DONOŠENJE PROPISA.**

U toku 2010. godine smo prošli certifikacijsku provjeru prema zahtjevima ISO 9001:2008 sa pozitivnim komentarima ovlaštenih auditora.

Politika kvaliteta općinske administracije je bazirana na izjavi: **Naš uspjeh je baziran na jasnoj viziji razvoja zajednice, kontinuiranom poboljšanju efektivnosti naših usluga, procesa i sistema upravljanja kvalitetom** te na temelju općih ciljeva kvaliteta:


- 👉 Stalna edukacija i osposobljavanje uposlenih potrebnim znanjima i vještinama;
- 👉 Stvaranje korisnički orijentisanog, efikasnog i transparentnog sistemaopćinske uprave koji kontinuirano obezbjeđuje pružanje usluga visokog kvaliteta korisnicima usluga;
- 👉 Doprinos razvoju zajednice i pozitivnog ambijenta za investicije poslovnog svijeta;
- 👉 Razvoj partnerskih odnosa sa građanima, nevladinom sektorom i poslovnim svijetom;
- 👉 Zadovoljstvo uposlenih kroz priznanja rukovodstva za dostignute ciljeve i priznanja korisnika usluga;
- 👉 Zadovoljstvo korisnika usluga.

Svi uposleni su upoznati sa ovom izjavom i ista se preispituje pri ocjeni sistema kvaliteta od strane rukovodstva jednom godišnje.

Prema ranije iznesenom možete vidjeti da se politika kvaliteta dosljedno slijedi i provodi.

d) organizacija

Općinska administracija je 2010. godinu startovala sa 102 zaposlena a završila sa 99 i završila na temelju različite organizacije organa uprave Općine Tešanj. Iako je postojala snažna potreba da se neka područja ojačaju, postoji manjak kapaciteta prije svega kod Javnog pravobranioca i inspekcija, nismo pristupili popuni zbog neizvjesnosti trenda u prihodima kao i nesigurnosti u pogledu podrške Vijeća potrebnom budžetu za uposlene. U 2011. godini će ovo biti potrebno napraviti.



EKONOMIJA

a. Industrijske zone

Općina Tešanj je nastavila prioritetno rješavati zahtjeve koji su dolazili iz proizvodnog sektora, a Općinski načelnik je u nekoliko slučajeva primio riječi pohvale za rad administracije za uspješno pružene usluge. Na žalost, zbog negativnih trendova na širem planu nismo imali veliki broj zahtjeva. Ostvarili smo interaktivan odnos kroz posjete i zajedničke akcije uređenja grada, eko-parkove i partnerski odnos u nepovoljnim okolnostima.

Nastavili smo aktivnosti na uređenju industrijske zone Vila, Bukva kroz programe podrške federalne i kantonalne vlasti. Položena je osnovna infrastruktura a putevi kroz zonu su dovedeni na nivo osiguranih sredstava za radove za asfaltiranje. Izrađen je marketing plan za promociju zone i privlačenje investitora. Izvršene su sve pripreme i završena javna nabavka za projektovanje zone Glinište, Jelah-Rosulje, te izvršene pripreme za emisije općinskih obveznica radi rješavanja imovinsko-pravnih odnosa u ovoj zoni.

b. Poljoprivreda

Poticaji poljoprivredi su u skladu sa općinskom odlukom realizirani u cijelosti, sa koeficijentom 0,83 za 518 korisnika poticaja, a koordinirane su aktivnosti u vezi sa poticajima iz kantonalnog i federalnog budžeta. Na žalost, ovogodišnji poticaji sa viših nivoa vlasti nisu imali pozitivan efekat kao prethodnih godina, i djelimično su negativno uticali na efekte koje smo postigli našom budžetskom podrškom. Naime, zbog smanjenje sredstava na višim nivoima, mnogi zahtjevi su odbijani rješenjima na koja se nije moglo žaliti, a naši poljoprivrednici izloženi nepotrebnom trošku i ostavljeni sami sebi.

Završen je Registar poljoprivrednih gazdinstava u saradnji sa resornim federalnim ministarstvom i prema njihovim instrukcijama. Sa krajem 2010. godine je registrovano 797 poljoprivrednih gazdinstava.

c. Saobraćaj

Ulaganje u ljetno i zimsko održavanje puteva je realizirano prema raspoloživim sredstvima. Karakteristika protekle godine je i veliki broj jakih padavina koje su poništavale efekte makadamskog održavanja puteva. Postigli smo povoljnije uslove održavanja, a prigovori na kvalitet izvedenih radova su bili minimalni. Ozbiljnije prigovore smo imali za održavanje zimsko održavanje puta Tešanj-Tešanjka, i Tešanj-Medakovo-Šije a protiv jednog izvođača radova se vodi i sudski postupak.

Izgradnja lokalnih puteva prema listi kapitalnih projekata je realizovana 95% a za kanalizaciju u Potočanima, Jelah je potpisan ugovor. Posljednja faza izgradnje puta Medakovo-Šije, realizovana sredstvima federalnog ministarstva, je urađen ali put nije u funkciji zbog pojava dva klizišta koja su uzrokovala da trasa u dužini 100 m ostane nedovršena.

Nakon sedam godina, prvi puta nije bilo sredstava za puteve iz kapitalnog dijela budžeta ZDK ali su realizovani putevi iz 2009. godine: Treća traka Bukva – 1. faza, autobusko okretište i stajalište za SŠC – Dolac, 4. faza i spajanje puta Džemilić Planje – Oraš Planje i asfaltiranje dječijeg igrališta kod područne škole “Rešad Kadić”, puteve u Medakovu i Trepču. Put u Joldićima oko koga je Vijeće vodilo raspravu i mediji nije realizovan, i sredstva su preusmjerena na treću traku Bukva.

Sredstva sa ESCROW računa Vlade ZDK nisu utrošena 90% zbog vaninstitucionalnog kandidovanja projekata i prihvatanja istih od strane Vlade ZDK. Ipak su ugovori potpisani u iznosu od 625.000,00 KM dok je javna nabavka u toku za preostali iznos od 75.000,00 KM. Imali smo i netačno informisanje javnosti medija sa federalnog nivoa o ovome, i ovakvim informacijama se općinska vlast stavlja u negativan kontekst bez činjenica nego na temelju laičkog mišljenja zainteresovanih strana.

Iz sredstava GSM operatera smo imali prvo 4 projekta u iznosu od 200.000,00 KM koja su, iako u odluci Vlade FBiH piše “na prijedlog općina” predložena vaninstitucionalno. Zatim je iznenada zatraženo da Općina predloži još dva projekta u iznosu od po 75.000,00 KM u roku od dva dana. Mi smo predložili nastavak radova na LC 8: Marin han – Raduša i nastavak asfaltiranja puta u Starom Kraševu. Na kraju smo odlukom Vlade FBiH dobili ova dva projekta i još četiri projekta kao rekonstrukciju puteva koji su predloženi vaninstitucionalno u iznosu 150.000,00 KM za četiri lokacije. Javna nabavka je u toku za ove projekte.

Raskrsnici Jelah smo posvetili pažnju, ali drugi sudonici (regionalni put R 474 i magistralni put M17 u nadležnosti kantona i federacije), iako uključeni i dali podršku, nisu bili dosljedni. Dobili smo izvedbeni projekat za raskrnicu ali bez semafora, na kraju se projektna kuća izjasnila da je radila po instrukcijama kantonalne i federalne direkcije, ovi opet da nisu dobro razumjeli naš zahtjev. U svakom slučaju je ovo pitanje nešto što nemamo ovlaštenja da radimo sami, odobrenja daju kantonalna i federalna direkcija, svi pokazuju volju čak su i finansije bile obezbjeđene za 2010. godinu ali nemamo krajnji rezultat. Ja imam određene sumnje ali od toga nema nikakve koristi. Ponovo smo pokrenuli ovo pitanje i istrajaćemo na njemu.

d. Turizam

Život na Starom gradu je bio bogatiji nego ranije. Stavljanje najstarijeg kulturno-historijskog spomenika – Gradine, u životno okruženje prethodne godine je bio dobar osnov za implementaciju većeg broja kulturnih sadržaja tokom 2010. godine. Nastavljeni su radovi na sanaciji zidina, podizanju nove bine sa osvjetljenjem i rasvjetom, postavka binokulara, dječijeg igrališta te sanacija Krnje kule sredstvima kroz MDGF projekat i budžetskom podrškom različitih nivoa vlasti.

Eminagića konak je u pogledu enterijera priveden namjeni, i ovaj objekat će u prvoj polovini 2011. godine biti stavljen na raspolaganje građanima i gostima, a u toku je i izrada posebne internet strane. Izvršena je nužna sanacija i osvježenje mezara “Musa Ćazim Ćatić”, a urađen je projekat restauracije spomenika “Musala”.

Grad je i dalje bez hotela jer ponuđena varijanta mogućeg rješenja nije dobila podršku.

Urađen je i Master plan turizma 2010-2020., finansiran od strane federalnog ministarstva turizma i okoliša na koji nismo imali veliki uticaj, tako da ćemo morati na ovom dokumentu još lokalno poraditi prije odgovarajuće odluke prema Općinskom vijeću.

Tokom 2010. godine smo imali značajno prisustvo različitih manifestacija kako na općinskom nivou koja promoviraju općinske praznike ali i jedan širi kulturni aspekt radi zadovoljavanja interesa građana. Posebno bih istakao Tešanjско proljeće i obilježavanje 04. Aprila koji su organizacijski nosile boračka udruženja. Ono što se pojavljuje u ovom području kao pitanja na koja treba naći odgovore i postići društveni i politički konsenzus, odnosi se visok stepen različitosti, izostanak veće koordinacije i

racionalne trošenje sredstava u ovom području. Za sada koordinacija postoji kod općinskih manifestacija. Jelaško ljeto je izraslo u tradicionalnu manifestaciju širih razmjera, Takmičenje folklornih društava na Tešanjci, Festival omladine RASTOK želi veći prostor i podršku, druge mjesne sredine žele slične manifestacije. Istu manifestaciju podržava budžet Općine, a onda mz-a opet iz sredstva budžeta Općine Tešanj i tako dalje.

Završili smo prijedlog jednog dokumenta za Općinsko vijeće koji bi napravio više reda, ali ga nisamo predložili jer nismo sigurni može li Općinsko vijeće u sadašnjim okolnostima to artikulirati da dobijemo potrebnu korist.

Udruženje "SEHARA" je pokrenulo i etno festival, i postoje izgledi da se on uspješno razvije.

EKOLOGIJA

a. Kanalizacija

Pored predstudije i projektnog zadatka proveden je postupak i potpisan ugovor o izradi Studije i idejnog rješenja prihvatanja, odvodnje i prečišćavanja otpadnih voda za cijelo područje općine Tešanj, i isti je u posljednjoj fazi izrade. Slijedi izrada idejnog projekta do kraja 2011. godine a nakon toga i izvedbenog projekta. Uključenost KP "RAD" u ove aktivnosti je potpuna.

Tokom 2010. godine Općina Tešanj je uspjela ući među nekoliko općina Federacije BiH za veoma povoljan dugoročni kredit kod EIB, o čemu je i Vijeće dalo preliminarnu podršku. Možemo kazati da u ovom području aktivnosti su dobro koordinirane i dobro napreduju, tako da bi realizacija izvođenja glavnih tačaka projekta mogla krenuti znatno ranije od ranije planiranog, a to je 2012-2013 godine.

Urađena je kanalizacija u ulici Meše Selimović u samom gradu, a ugovor potpisan za prvu fazu izgradnje kanalizacije u naselju Potočani, Jelah kao i za kanalizaciju u Šijama. Kanalizacija Raduša, započeta 2004. godine, njena prva faza, je okončana ugovorom sa KP "RAD" a ugovor sa ranijim izvođačem Inženjering, Jelah raskinut i pokrenuće se sudski postupak. Ugovoreno je projektovanje kanalizacije u Kraševu.

b. Vodosnabdijevanje

U vezi pitanja: **šta je rješenje u pogledu vodoizvorišta za 60.000 ljudi?**, počeli smo raditi na dobivanju odgovora. Izrađena je studija, i opredjeljene ispitne bušotine u području Šija. Ukoliko pokazatelji budu optimistični, nastavićemo u tom smjeru a ukoliko ne, okrenućemo se punom ispitivanju mogućnosti vodotoka Usora sa svih aspekata.

Vodovod „Pousorje“ je priveden kraju i zbog nužnih odstupanja tokom izvođenja oko lokacije rezervoara, izvršili smo dodatno projektovanje koje je definisalo novo pumpno postrojenje kako bi se riješio nastali problem nivelacije rezervoara. Vodovod "Pousorje" je tehnički primljen, i predate na trajno upravljanje KP "RAD", a ostaje da se u 2011. godini ugradi novo pumpno postrojenje kako bi se sadašnji problem sa punjenjem rezervoara prevazišli. Izvršene su i sve pripreme za realizaciju prve faze telemetrijskog upravljanja cijelim sistemom sa vodozahvata Jelah, a podršku je osigurala federalna vladina agencija "ODRAZ" i KP "RAD". Ostao je i dio obaveza mz-a sudionika izgradnje u iznosu od 82.375,49 KM prema Budžetu Općine.

Nastavljena je gradnja na vodovodu Oraš Planje (rezervoar i vodozahvat su završeni), a izgrađen rezervoar za vodovod Dobroplje-Mekiš, te primarni vod do rezervoara R1 kao i sekundarni vod Dautovača. Ugovoreni i započeti radovi na izgradnji prvog rezervoara za vodovod Medakovo.

Veliki problem je sistem vodosnabdijevanja pet mz-a: Rosulje, Ljetinić, Novo Selo, Žabljak i dio Medakova. Ovim sistemom upravlja privatno preduzeće "ROSA", koje je sudski registrovano. Neslaganja unutar rukovodstva ovih mjesnih zajednica o načinu na koji bi se upravljalo vodovodom smo pokušali riješiti u više navrata, bez uspjeha. MZ Ljetinić ima jedan stav, ostali imaju drugačiji stav. Postoji ozbiljan rizik da građani – korisnici usluga ostanu bez vode ukoliko se u kratkom roku ovo ne riješi. Na žalost neki predstavnici mz-a konsultuju i slušaju stranačka rukovodstva a ne općinsku administraciju.

c. Prikupljanje otpada i čistoća ulica

Održan je visok nivo čistoće ključnih ulica i saobraćajnica, ali još uvijek smo udaljeni od proklamovanog stanja. Potrebno je prilagoditi odvoz smeća u terminima kada je manja frekvencija saobraćaja, ali i u terminima koji neće praviti pauze zbog vikenda. Posebno uspješno se razvija projekat prikupljanja PET ambalaže (ugovor: osnovne i srednje škole – EKO mladi – Omorika, Doboj – Općina Tešanj). Ovom projektu su dale podršku i neke private firme, a količina PET ambalaže sa 31.12.2010. godine koja je prikupljena i predate za reciklažu je dostigla cifru od 500.000 boca.

Istovremeno, i pored promotivnih aktivnosti na izgradnji svijesti, ne daju očekivane rezultate. Neefikasne mjere sankcionisanja trebamo razmotriti i podići na nužan nivo efikasnosti koji će djelovati na građane. Možemo prikupiti stotine tone smeća, ali samo jedna tona ili manje razbacanog smeća u prolazu ostavlja sliku koju niko ne želi vidjeti.

Sveobuhvatno prikupljanje smeća ostaje prioritarna tema za koju još nije pronađen adekvatan odgovor.

MLADI

Prema provođenju politike prema mladima, Općina Tešanj je rangirana na 2. mjestu u BiH po ocjeni CCI (Centra civilnih inicijativa), STIPENDIJE SVIMA su osigurane i u 2009/2010 godini, iako nismo imali u budžetu dovoljno sredstava. Uspjeli smo ipak finansijski osigurati dodatne namjenske prihode zahvaljujuću Vladi ZDK. Podrška mladima kroz različite projekte kako udruženjima mladih tako i neformalnim grupama mladih je postala prepoznatljivo, a saradnja sa nevladinom organizacijom MOZAIK, Sarajevo i Omladinskom bankom, Tešanj se razvila u primjer dobre prakse. Mladi osmišljavaju projekte, dobivaju podršku i realizuju. Tokom godine relizovali su oko 30 projekata sa finansijskom podrškom općine Tešanj i Mozaika u iznosu većem od 60.000 KM. Urađeno je devet dječijih igrališta

Donesena je Strategija za podršku mladim sa 27 definisanih ciljeva čiju provedbu smo započeli i istu nastavljamo u 2011. godini.

CIVILNA ZAŠTITA

Natsavljene su aktivnosti na Programu razvoja zaštite i spašavanja, kao i u propisima iz oblasti zaštite i spašavanja Općine, Kantona, Federacije i BiH. Pri tome je ostvarena neophodna saradnja sa građanima, mjesnim zajednicama, pravnim licima, nadležnim organima i institucijama. U protekloj godini uspostavljena je zakonita, ekonomična i optimalna organizacija zaštite i spašavanja, a u skladu sa urađenom Procjenom ugroženosti područja općine Tešanj kao jednim od strateških dokumenata iz oblasti zaštite i spašavanja. Općinski štab civilne zaštite općine Tešanj izvršava zadatke u fazi priprema Općine za zaštitu i spašavanje, kao i situacijama nastanka prirodnih i drugih nepogoda kada rukovodi akcijama zaštite i spašavanja. Isti je protekloj godini reduciran sa 16 članova na 13 članova iz razloga stručnosti, ekonomičnosti, racionalnosti i operativnosti, te je u proteklom period donio je niz važnih odluka. U izvještajnom period radilo se na uspostavi i jačanju struktura civilne zaštite provedena je kompletna zakonska procedura u formiranju službi zaštite i spašavanja te su formirane 4 (četiri) službe i to: **služba prve medicinske pomoći, služba veterinarske pomoći, služba za spašavanje iz ruševina, služba za asanaciju, vodosnabdjevanje i čistoću**. Službe imaju jasno definisane zadatke, a u glavnom se radi o zadacima koje uposlenici pravnog subjekta izvršavaju kao redovnu djelatnost. Takođe formirana je i specijalizovana jedinica zaštite od požara u čiji sastav su ušle: profesionalna vatrogasna jedinica, članovi DVD Jelah i članovi DVD Tešanj 1905. Formiranjem ovih struktura zaštite i spašavanja sistem bezbjednosti je dignut na viši nivo, a sigurnost građana i materijalnih dobara dostigao je viši stepen zaštite. Materijalna opremljenost struktura zaštite i spašavanja je jedan od bitnijih elemenata u sistemu. Tako je u izvještajnoj godini za potrebe operativnog centara i profesionalne vatrogasne jedinice nabavljena neophodna oprema za nesmetan rad i funkcionisanje, gdje naglašavam ličnu zaštitnu opremu za intervenciju za sve profesionalne vatrogasce, čime su profesionalni vatrogasci jedni od najopremljenijih u BiH što se tiče lične zaštite opreme. Provođene su preventivne, operativne mjere i aktivnosti zaštite i spašavanja s akcentom na zaštitu od NUS-a i MES-a, zaštite od požara te zaštite okoline. U 2010. godini prikupljeno je uništeno 425 komada raznog NUS-a, dok je do sada deminirano 246.265,13 m² površine. Izuzetnim zalaganjem zaposlenih u Službi postiglo se to da je općina Tešanj, odnosno Služba civilne zaštite među prvima na ZE-DO kantonu dobila ovlaštenje da može vršiti obučavanje stručnih lica za kontrolu aparata za početno gašenje požara. Profesionalna vatrogasna jedinica u 2010. godini imala je 46 intervencija koje je uspješno realizovala. Dalje aktivnosti su usmjerene ka jačanju struktura zaštite i spašavanja, materijalnom opremanju i obučavanju.

JAVNA PREDUZEĆA

Obzirom da vijećnici dobiju posebnu informaciju o radu javnih preduzeća i ustanova (sa izvještajima o radu), onda u ovom izvještaju će biti naznačene samo glavne stvari. Za 2010. godinu nije bilo nikakvih smjernica za rad od strane Općinskog, kako za javna preduzeća tako ni za javne ustanove.

a. KP "RAD"

U toku 2010. godine KP "RAD" je značajno podigao nivo uključenosti u rješavanju ključnih pitanja iz svoje nadležnosti u koordinaciji sa općinskom administracijom. Tu ističem aktivnosti na ključnom projektu prihvatanja, odvodnje i prečišćavanja otpadnih voda na cijelom području općine Tešanj, te izrada studije za vodoistražne radove. Nekoliko projekata na nivou građevinske operative: vodovod Dobropolje-

Mekiš, završetak 1. faze kanalizacije Raduša nakon nekoliko godina zastoja sa prvim izvođačem radova, kanalizacija u ulici Meša Selimović, zamjena većeg dijela glavnog cjevovoda vode u Cerovcu, kao i ugovor za izgradnju kanalizacije u Potočanima, Jelah – 1. faza.

b. JP “Toplana”

Iako je JP “Toplana” na tekućem nivou osigurala pravovremenu i redovnu isporuku toplotne energije, jedan broj kupaca je prigovarao zbog visine cijene usluge i načina obračuna, a MANN+HUMMEL najavio isključenje sa ovog sistema i izgradnju sopstvenog sistema grijanja. Sve skupa je uticalo in a odnose između Upravnog odbora i Direktora, tako da je održan i jedan zajednički sastanak općinskog načelnika sa saradnicima, članova upravnog odbora, direktora, predsjedavajućeg vijeća i predsjednika klubova vijećnika. Trenutno postoji radna atmosfera na relaciji upravni odbor – direktor, i nastojanja da se problem prevaziđu.

c. JP Veterinarska stanica

Izvršena priprema za privatizaciju JP „Veterinarska stanica“ a Općinsko vijeće prihvatilo informaciju o tom procesu.

d. JP “TRA”, tešanjaska razvojna agencija

Agencija za razvoj je tokom većeg dijela godine imala jednog uposlenika obzirom da je teška operacija srca Direktora Agencije odvojila od redovnih aktivnosti. I u takvim okolnostima Agencija je osigurala više kontakata i posjeta, a sudjelovala je u zajedničkim projektima sa općinskom administracijom. Krajem m godine je uređen prostor na spratu gdje je bio smješten Sud, i primljen još jedan uposlenik na određeno vrijeme, a Direktor je ponovo svakodnevno na poslu, tako da Agencija dočekuje 2011. godinu znatno spremnija.

JAVNE USTANOVE

a. OPĆA BOLNICA

Tokom 2010. godine Opća bolnica je investirala preko 700.000,00 KM u novu opremu i infrastrukturu. Najveću finansijsku podršku je dobila od Vlade ZeDo kantona, Fonda zdravstvene zaštite, Općine Tešanj i donatora – privrednika. Na ovaj način, uz sve drugo, Bolnica radi na poboljšanju i proširenju usluga, kako bi obezbijedila stabilnu budućnost ustanove. Započet je značajan projekat informatičke podrške. Tužbe uposlenika po kolektivnom ugovoru iz ranijeg perioda su svedene na 20 uposlenika, i po prvostepenoj presudi o ukupnom iznosu do 60.000,00 KM. Obzirom na početno stanje ovo je mnogo bolja situacija.

b. DOM ZDRAVLJA

Dom zdravlja je također osigurao određen nivo investicija u nova vozila za hitnu službu, aparati za oftamologiju, ginekologiju i stomatologiju kao i opremanje jednog dijela ambulante Jelah. Započet je značajan projekat informatičke podrške. Plate upsolenih su ostale na nivou prethodne godine a očekuje se bolji rezultat poslovanja nego u 2009. godini.

a. CENTAR ZA SOCIJALNI RAD

Centar za socijalni rad je u 2010. godini u saradnji sa drugima uspio obezbijediti sredstva za uređenje prostorija u zgradi Obdaništa. Pored toga redovno su servisirani korisnici socijalnih usluga obavezama iz federalnih, kantonalnih i općinskih propisa.

b. CENTAR ZA KULTURU I OBRAZOVANJE

U 2010. godini Centar za kulturu i obrazovanje organizirao je 9 likovnih izložbi, 16 različitih književnih večeri (od kojih 2 međunarodnog karaktera), priredio 5 javnih tribina s različitim temama (na kojima su uvodničari redovno bili doktori nauka), dao 2 filmske i organizirao 6 pozorišnih predstava. Centar je organizirao i naučni skup o književnom djelu Kemala Mahmutefendića, a Ustanova je objavila i 6 novih knjiga (do sada ukupno 110 izdanja).

Tokom 2010. godine sredstvima Općine dovršena je sanacija krova Doma kulture, a Centar je nabavio i novo motorno vozilo (fabia) prvenstveno od sredstava dobivenih prodajom obveznica ratne odštete Ustanove.

c. OPĆA BIBLIOTEKA

Opća biblioteka pored redovnih usluga svojim članovima, bila je angažirana na pripremama i početku gradnje novog objekta. Tokom godine Biblioteka je radila na organizaciji kulturnih sadržaja, kojima je nastojala doprinosti općem ambijentu, te promovirati važnost knjige i znanja. Pored toga u Tešnju je organizirana još jedna Konferencija bibliotekara.

d. MUZEJ

U 2010. godini Muzej je radio na obezbjeđenju početnih uslova za rad sakupljanjem muzejskog materijala i njegovoj obradi i izlaganju i drugim materijalnim pretpostavkama za rad. I pored svih nastojanja, nažalost Muzej nije u 2010 godini ispunio uslove Ministarstva obrazovanja kako bi prešao na finansiranje Zeničko-dobojskog kantona. Fokus daljih aktivnosti usmjeren je na ovo vrlo važno pitanje.

e. SPORTSKA DVORANA

Sportska dvorana je investirala u završetak radova – podloge za tenisko igralište sospotvenim sredstvima u 2010. godinu. Sportska dvorana je samoodrživa i primjer za sve slične dvorane u okruženju, jer gotove sve imaju velike probleme sa finansiranjem a neki su čak ostali bez struje. Ovo govori o odgovornom rukovodstvu ali i dobro postavljenom početnom konceptu funkcionisanja dvorane. Stoga je važno da i vijećnici ovo znaju, jer neki postavljaju pitanja da je skup sat korištenja sale u dvorani i stoga što je skup ne dvorana ne služi svrsi. Naravno da dvorana služi svrsi a cijena usluge osigurava dugoročnu održivost. Ako jednog dana javni prihodi budu tako izdašni da može dvoranu staviti Općina na budžet, onda će moći i usluga biti besplatna.

MJESNE ZAJEDNICE

Ozbiljna kriza u funkcionisanju organa mjesnih zajednica bila je u MZ Kalošević. Povjerenik imenovan od Općinskog vijeća, ostao je nepotrebno dugo jer delegirani predstavnici ispred mjesnih odbora političkih stranaka u skupštinu MZ Kalošević nisu željeli završiti izbor članova savjeta. Ipak, krajem 2010. godine taj process je okončan - jednoglasno.

Kriza je proizvedena i u organima MZ Dobropolje-Mekiš tako da se Savjet ove mjesne zajednice nije mogao održati duže od tri mjeseca, jer pozivani članovi se nisu odazivali, a Skupštine mz-e nije na ovo reagovala. Slijede mjere shodno statutarnim obavezama.

Izostanak saradnje organa MZ Jelah sa općinskom vlasti i neke nelegalne odluke završilo je raspravom na Općinskom vijeću i usvajanjem informacije o otklanjanju nedostataka. Spremnost da se nedostaci otklone iskazala je i svojim zaključkom Skupština MZ Jelah.

Ostale mjesne zajednice su radile sa manje ili više teškoća, o čemu će Vijeće dobiti odvojenu cjelovitu informaciju.

NVO

Aktivnosti NVO u protekloj godini su bile u nekim područjima intenzivnije nego u godini prije. Ostaje za analizu pitanje u kojoj mjeri je NVO istinski neutralan, a koliko uključen u povremenu podršku političkim strankama? Odgovor neće biti teško naći, ali ako se potvrde sumnje i prigovori, trebaće dosta zajedničkog napora da se pomogne ovom sektoru u ispravnom razvoju.

I dalje je otvoreno pitanje koje treba na najbolji način riješiti: kako upravljati podrškom ovom sektoru, a da istovremeno zajednica tim putem dobije najviše, odnosno kako da se što manje potroši na administriranje (što bi svakako trebala biti volonterski doprinos a ne trošak zajednice), zatim na nepotrebne administrativne troškove a što više na aktivnosti koje doprinose zdravijem, lakšem i boljem životu naših ljudi i razvoju zajednice u cjelini. Bez obzira na to, ovaj sektor zaslužuje priznanja i podršku, jer je kroz aktivnosti u ovom području još uvijek najviše volonterskog rada u kroist zajednice. Općinsko priznanje "Plaketa" od strane Općinskog vijeća su dobili NHU "OSLONAC", Izviđači "Crni vrh", te lovačko udruženje "Kiseljak".

U pogledu odnosa prema lokalnoj vlasti, jedino JOM, Jelah je izašao izvan okvira djelovanja nevladinog sektora koristeći riječnik mržnje a Općinskog načelnik nazvao neprijateljem jedne naše sredine.

BORAČKE POPULACIJE

U cjelini smo imali dobru saradnju sa boračkim organizacijama. Prava boračkih populacija po različitim osnovama su utvrđena zakonom viših nivoa vlasti. Ona se kao takva i realiziraju prije svega iz tih izvora, a ne lokalnog budžeta, ali se dominantno realiziraju putem općinske službe. Na kraju, ljudima je najlakše iskazati svoj protest onome komu je najbliže bez obzira na nadležnost. To treba razumjeti, i cijenim da su rukovodstva 4 udruženja od posebnog interesa utvrđena od strane Općinskog vijeća na lokalnom nivou: Udruženje šehidskih porodica i poginulih boraca, Jedinствена organizacija boraca, Udruženje RVI i Udruženje dobitnika najvećih ratnih priznanja pokazali puno razumijevanje za naše uloge i odgovonosti.






Nadležna služba je u 2010. godini kontinuirano radila na ostvarivanju dopunskih prava korisnika boračke populacije (banjsko liječenje, teška ekonomska situacija, liječenje, finansijska pomoć u sličaju smrti pripadnika boračke populacije I dr.), koja se ostvaruju putem nadležnog Kantonalnog ministarstva.

U 2010. godini završeno je i otvoreno spomen obilježje u MZ Medakovo dok spomen obilježje u MZ Miljanovci je u završnoj fazi.







PENZIONERI

Život penzionera u Tešnju kao i na širem prostoru nije nimalo lakak. Većina penzionera je na granici preživljavanja, a u slučaju bolesti, ako nema pažnje porodice, dolaze u bezizlaznu situaciju. Općina ima veoma dobru saradnju sa udruženjem penzionera, i jedina smo općina u ZeDo kantonu koja osigurava dodatnu podršku ovoj kategoriji. Ostaje i dalje veliki problem plaćanja zdravstvenih usluga koje Opća bolnica Tešanj i Dom zdravlja mogu pružiti, ali su te usluge samo besplatne u kantonalnoj bolnici Zenica. Fond zdravstva još ne finansira sve usluga koje Opća bolnica može pružiti pa u tim slučajevima pacijenti sami snose trošak. Vode se stalno aktivnosti da se ovo razriješi.



Sumar

-  **Uprava:** možemo konstatovati s pravom: općinska uprava provodi reforme. Put ka općinskoj administraciji kao e-upravi je prepoznatljiv, elektronske baze podataka, analize, monitoring, nove ideje, institucionalni imidž, upravljanje ciljevima, procesni pristup!
-  **Infrastruktura:** standardni pristup prema raspoloživim izvorima nastavljen, ključni iskoraci: sistemski koraci u rješavanju kanalizacije na cijelom području općine Tešanj odvijaju se uspješno, studija za istražne radove podzemnih voda urađena u potrazi za vodoizvoristom sa dovoljnim količinama vode.
-  **Ekologija:** projekat prikupljanja PET ambalaže je jedinstven primjer dobre prakse u BiH, a akcije čišćenja korita rijeka je intenzivirana sa učešćem NVO, građana i podrškom federalnog Fonda za okoliš.
-  **Javno-privatno partnerstvo:** realizacija regulacionog plana "MUSALA" se odvija prema planu; popisan ugovor za „Katangu“, usvojen urbanističko rješenje za Vrata 2 – ulaz u grad, autobuska stanica. Zbog različitih pogleda nismo uspjeli napraviti veće korake u pogledu sadržaja hotel „Zvečaj“ u gradu, u toku je izrada urbanističkog rješenja za centar Jelaha.
-  **Uređenje Grada:** Stari grad i Eminagića konak izgledaju drugačije, na upotrebi građanima nastavljamo mijenjati dugogodišnji izgled Grada uz donatorsku podršku, naša sredstva i naše vođenje. Ovo je suštinski važno: privrednici treba da žive sa svojim Gradom a mi da imamo interaktivan odnos sa zajednicom i da budemo lideri u promjenama.

Pogled u budućnost:

-  grad Tešanj kao administrativni centar treba da odiše čistoćom ali i lijepim izgledom,
-  Jelah treba razvijati kao komercijalno-industrijski a ne kao novi administrativni centar sa mnogo više osjećaja i organiziranosti,
-  ulaganja u industrijske zone mora biti u vrhu prioriteta kako bi investitori imali povoljne uslove,
-  razviti turistički proizvod "Vikend u Tešnju" u kome će Gradina biti ključ ali nikako jedini sadržaj,
-  nastaviti izradu dokumentacije do nivoa kompletne projektne dokumentacije za transport i preradu otpadnih voda
-  Nastaviti sa podrškom mladima u različitim područjima

Potrebno nam je prije svega:

-  Društveni konsenzus na strateškim opredjeljenjima (međustranački na prvom mjestu),
-  Istrajnost i posvećenost administracije.

...kako bi mogli glasno kazati da je u Tešnju:



Općinski načelnik
Fuad Šišić, dipl.ing. maš.